

Ismet Osmanović

Poslanik u PD PFBiH

NACRT

Z A K O N
O BORAČKIM UDRUŽENJIMA OD POSEBNOG DRUŠTVENOG
ZNAČAJA

Sarajevo 03.Juni 2016.g.

(Nacrt)

ZAKON O BORAČKIM UDRUŽENJIMA OD POSEBNOG DRUŠTVENOG ZNAČAJA

Član 1.

Ovim Zakonom uređuju se: uslovi za osnivanje i registraciju, finansiranje rada i djelatnosti, nadzor nad radom, nadležni organ za registraciju, kao i druga pitanja bitna za osnivanje boračkih udruženja od posebnog društvenog značaja.

Član 2.

Pod pojmom boračkih udruženja od posebnog društvenog značaja podrazumjevaju se udruženja koja okupljaju pripadnike Oružanih snaga Republike Bosne i Hercegovine i ostala lica koja baštine tekovine antifašističkih odbrambeno-oslobodilačkih ratova, (u daljem tekstu: Udruženja od posebnog značaja).

Član 3.

Udruženja od posebnog značaja svoje ciljeve i djelatnost utvrđuju svojim aktima u skladu sa Ustavom i Zakonom.

Član 4.

Status Udruženja od posebnog značaja mogu steći i isto registrovati pripadnici Oružanih snaga Republike Bosne i Hercegovine i ostala lica koja baštine tekovine antifašističkih odbrambeno-oslobodilačkih ratova pod uslovom:

- 1) da udruženje okuplja najmanje 55% članova iz kategorije koju predstavlja u Federaciji Bosne i Hercegovine po komponentama (Armije R BiH, MUP R BiH i HVO ili dr.).
- 2) da udruženje demobilisanih branilaca iz komponente Armije R BiH okuplja minimalno 30.000 članova, a iz komponente HVO-a 10.000 članova.

Član 5.

Podaci referentni za utvrđivanje posebnog broja članstva za registraciju su podaci kojima raspolaže Federalno ministarstvo za pitanje boraca i invalida odbrambeno-oslobodilačkog rata/Federalno ministarstvo za pitanje branitelja i invalida domovinskog rata.

Pripadnik svake boračke kategorije može biti član više Udruženja od posebnog značaja ako ispunjava uslove za članstvo.

Član Udruženja od posebnog značaja može biti u organima upravljanja samo jednog takvog udruženja.

Član 6.

Prilikom registracije Udruženja od posebnog značaja osnivači prilažu ovjereni spisak pripadnika oružanih snaga Republike Bosne i Hercegovine i lica koja baštine tekovine antifašističkih odbrambeno-oslobodilačkih ratova. Spisak sadrži: ime, ime oca, prezime, JMB i svojeručni potpis. Spisak mora zadovoljavati brojčanu kvotu utvrđenu članom 4. ovog Zakona.

Potvrdu o postojanju potrebnog broja pripadnika oružanih snaga Republike Bosne i Hercegovine i lica koja baštine tekovine antifašističkih odbrambeno-oslobodilačkih ratova (55% po kategoriji) za osnivanje Udruženja od posebnog značaja, izdaje Federalno ministarstvo za pitanja boraca i invalida odbrambeno-oslobodilačkog rata/ Federalno ministarstvo za pitanja branitelja i invalida domovinskog rata.

Član 7.

Finansiranje rada Udruženja od posebnog značaja reguliše se osnivačkim i internim aktima u skladu sa zakonom. Projekti Udruženja (značajni datumi, spomen obilježja i dr.) finansirat će se iz Budžeta Federacije BiH.

Član 8.

Registracija Udruženja od posebnog značaja vršit će se u Federalnom ministarstvu pravde po istoj proceduri koja vrijedi i za ostala udruženja, a pod uslovima propisanim ovim Zakonom i Zakonom o udruženjima i fondacijama („Službene novine Federacije BiH“ broj: 45/02).

U rješenju o registraciji, pored naziva Udruženja, obavezno se navodi i statusna kvalifikacija: Boračko udruženje od posebnog društvenog interesa.

Član 9.

Nadzor nad radom Udruženja od posebnog značaja vršit će Federalno ministarstvo za pitanje boraca i invalida odbrambeno-oslobodilačkog rata/Federalno ministarstvo za pitanja branitelja i invalida domovinskog rata.

Član 10.

Na pitanja koja nisu rješenja ovim Zakonom (opšta pravila registracije, unutrašnja struktura, finansijska sredstva, prestanak rada i sva druga pitanja koja nisu regulisana ovim Zakonom) primjenjuju se odredbe Zakona o udruženjima i fondacijama („Službene novine Federacije BiH“, broj: 45/02).

Član 11.

Postojeća udruženja boračkih populacija koja žele steći status boračkog udruženja od posebnog društvenog interesa dužna su svoju registraciju obnoviti u skladu sa odredbama ovog Zakona.

Član 12.

Ovaj Zakon stupa na snagu osmog dana od dana objavljivanja u „Službenim novinama Federacije BiH“

OBRAZLOŽENJE

I Ustavni osnov

Ustavni osnov za donošenje ovog Zakona sadržan je u odredbama IV A. 20. (1) d) Ustava Federacije Bosne i Hercegovine. Prema toj odredbi Parlament Federacije je nadležan za donošenje zakona o vršenju dužnosti federalne vlasti.

II Razlozi za donošenje Zakona

Nacrt Zakona pripremljen je u skladu sa dogovorom sa udruženjima koja okupljaju boračku populaciju, koja smatraju da je potrebno zakonski definirati status udruženja od posebnog društvenog interesa kako bi se u ovoj oblasti stvorili uslovi za bolju organizaciju boračkih udruženja i njihovo lakše i efikasnije funkcioniranje. Prema evidencijama dobijenim od Federalnog ministarstva za pitanje boraca i invalida odbrambeno-oslobodilačkog rata, trenutno na nivou Federacije BiH ima registrovano cca 1.500 boračkih udruženja. Ovim Zakonom se nastoji smanjiti taj broj, osigurati bolja organizovanost i utvrditi koja su to udruženja reprezentativna, odnosno koja predstavljaju većinu boračke populacije sa kojim predstavnici svih društvenih institucija mogu meritorno rješavati pitanja i potrebe iz oblasti branilačko-invalidske zaštite.

III Obrazloženje pojedinih rješenja

Članom 1. definisane su sadržajne cjeline Zakona.

Članom 2. propisano je da su boračka udruženja od posebnog društvenog značaja ona udruženja koja okupljaju pripadnike Oružanih snaga Republike Bosne i Hercegovine i ostala lica koja baštine tekovine antifašističkih odbrambeno-oslobodilačkih ratova.

Članom 3. propisano je na koji način ova udruženja utvrđuju svoje ciljeve i djelatnost

Članom 4. propisano je ko može steći status boračkog udruženja od posebnog društvenog značaja, koji je minimum članstva jedne boračke kategorije potrebno okupiti da bi se takvo udruženje moglo **formirati i registrovati**. Tako se propisuje da je za formiranje boračkog udruženja od posebnog društvenog značaja potrebno najmanje 55% članstva iz kategorije koju predstavljaju u Federaciji Bosne i Hercegovine po komponentama (Armija R BiH, MUP RBiH i HVO).

Članom 5. propisuje se koji su **podaci referentni za utvrđivanje potrebnog** broja članstva za registraciju. To su podaci sa kojima raspolaže Federalno ministarstvo za pitanje boraca i invalida odbrambeno-oslobodilačkog rata / Federalno ministarstvo za pitanje branitelja i invalida domovinskog rata. Ovim članom je takođe utvrđeno da pripadnik boračke kategorije može biti **član više udruženja** ali samo u rukovodstvu jednog udruženja.

Članom 6. propisan je sadržaj i ovjera spiska članova koji se podnosi prilikom registracije Udruženja.

Članom 7. propisan je način **finansiranja rada** udruženja kao i **finansiranje projekata** boračkih udruženja od posebnog društvenog značaja finansiranih iz Budžeta Federacije BiH

Članom 8. propisuje se nadležni organ za registraciju Udruženja kao i procedura registracije.

Članom 9. propisano je da će se nadzor nad radom Udruženja vršiti Federalno ministarstvo za pitanje boraca i invalida odbrambeno-oslobodilačkog rata/Federalno ministarstvo za pitanje branitelja i invalida domovinskog rata.

Član 10. propisuje se da će se sva pitanja koja nisu regulisana ovim Zakonom urediti prema odredbama „Zakona o udruženjima i fondacijama“ („Sl. novine Federacije BiH“ broj: 45/02)

Član 11. predviđa mogućnost da postojeća boračka udruženja koja žele steći status boračkog udruženja od posebnog društvenog interesa mogu izvršiti svoju preregistraciju u skladu sa odredbama ovog Zakona.

Član 12. propisuje stupanje na snagu ovog Zakona

IV Finansijska sredstva

Za provođenje ovog Zakona nisu potrebna dodatna finansijska sredstva u Budžetu.